



Na osnovu člana 152. stav 4., a u vezi sa članom 236. stav 1. alineja 28. Zakona o zdravstvenoj zaštiti ("Službene novine Federacije BiH", br. 46/10 i 75/13), federalni ministar zdravstva donosi

**PRAVILNIK
O IZMJENAMA I DOPUNAMA PRAVILNIKA O
KONTINUIRANOJ PROFESIONALNOJ EDUKACIJI IZ
ZDRAVSTVENOG MENADŽMENTA**

Član 1.

U Pravilniku o kontinuiranoj profesionalnoj edukaciji iz zdravstvenog menadžmenta ("Službene novine Federacije BiH", broj 88/11), iza člana 5. dodaju se novi čl. 5a, 5b. i 5c koji glase:

"Član 5a.

Za praćenje i provođenje profesionalne edukacije iz zdravstvenog menadžmenta, poboljšanje međusobnog kontinuiranog razumijevanja i aktivnog proširivanja obrazovne saradnje iz oblasti zdravstvenog menadžmenta, rješavanje operativnih pitanja tokom provođenja edukacije između ovlaštenih ustanova za edukaciju i polaznika edukacije, kao i odobravanje teme završnog rada, te njegove ocjene, federalni ministar zdravstva (u daljem tekstu: ministar) imenuje Koordinaciono tijelo iz oblasti profesionalne edukacije iz zdravstvenog menadžmenta (u daljem tekstu: Koordinaciono tijelo) na period od četiri godine, sa mogućnošću reizbora za još jedan mandatni period.

Članovi Koordinacionog tijela su predstavnici ovlaštenih ustanova za provođenje edukacije iz zdravstvenog menadžmenta, kao i predstavnici Ministarstva.

Koordinaciono tijelo iz stava 1. ovog člana ima sedam članova i sekretara

Ovlaštena visokoškolska ustanova u Koordinaciono tijelo delegira tri predstavnika, ovlaštena zdravstvena ustanova i Ministarstvo po dva predstavnika.

Koordinaciono tijelo ima predsjedavajućeg i zamjenika predsjedavajućeg.

Isti predsjedavajući i zamjenik predsjedavajućeg Koordinacionog tijela ne mogu biti predsjedavajući i zamjenik predsjedavajućeg dvije godine uzastopno.

Rotiranje na funkciji predsjedavajućeg i zamjenika predsjedavajućeg, u smislu stava 5. ovog člana, se obavlja svake dvije godine iz redova predstavnika ovlaštenih ustanova za edukaciju, a što mora biti verificirano i rješenjem ministra.

Koordinaciono tijelo ima pravo, uz saglasnost ministra, angažirati vanjske stručnjake u svom radu iz različitih oblasti, u zavisnosti od predmeta razmatranja ovog tijela.

Član 5b.

- Kriteriji za imenovanje članova u Koordinaciono tijelo su:
- minimalno 5 godina profesionalnog radnog iskustva u upravljačkim procesima,
 - relevantno iskustvo u oblasti zdravstvenog menadžmenta (operativnog),
 - relevantno radno iskustvo u oblasti obuke, treninga i kontinuirane profesionalne edukacije zdravstvenih profesionalaca iz oblasti zdravstvenog menadžmenta.

Član 5c.

Koordinaciono tijelo donosi poslovnik o svom radu kojim bliže uređuje način i postupak svog rada, kao i način glasanja i odlučivanja.

Poslovnik iz stava 1. ovog člana podliježe saglasnosti ministra.

Članovi Koordinacionog tijela imaju pravo naknade za svoj rad čija se visina utvrđuje posebnim rješenjem ministra.

Naknada iz stava 3. ovog člana isplaćuje se iz sredstava edukacije utvrđenih u članu 29. stav 3. ovog pravilnika.

Koordinaciono tijelo dužno je, svakih šest mjeseci, podnositi ministru izvještaj o svom radu."

Član 2.

U članu 7, stav 3. se mijenja i glasi:

"SHCE i TME edukacija iz zdravstvenog menadžmenta će biti certificirana od strane Ministarstva i ovlaštenih ustanova za provedbu edukacije iz čl. 12. i 13. ovog pravilnika."

Član 3.

U članu 8., u stavu 1, riječi: "jednom godišnje u zadnjem kvartalu tekuće godine za narednu godinu", zamjenjuju se riječima: "dva puta godišnje (zimski i ljetni semestar)".

U istom članu, u stavu 4. riječi: "federalni ministar zdravstva (u daljem tekstu: ministar)" se zamjenjuju riječju "ministar".

Član 4.

U članu 9, u stavu 2, alineja 3. se briše.

Dosadašnja alineja 4. postaje alineja 3.

Član 5.

Član 10. mijenja se i glasi:

"Član 10.

Nakon zaključenja isteka javnog oglasa, konsolidirane i dokumentirane zahtjeve, zajedno sa pratećom dokumentacijom, nosioci edukacije dostavljaju Ministarstvu.

Na osnovu konsolidiranih i dokumentiranih zahtjeva iz stava 1. ovog člana, vrši se odabir kandidata za naredni semestar.

Odabir kandidata vrši komisija od tri člana, koju čine predstavnici Ministarstva kao i ustanova koje provode edukaciju i koja se imenuje od strane ministra, na period od četiri godine sa mogućnošću reizbora za još jedan mandatni period.

Komisija iz stava 3. ovog člana donosi poslovnik o svom radu kojim bliže uređuje način i postupak svog rada, kao i način glasanja i odlučivanja, te isti podliježe saglasnosti ministra.

Članovi komisije iz stava 3. ovog člana, imaju pravo na naknadu čija visina se utvrđuje posebnim rješenjem ministra.

Nakon evaluacije pristiglih zahtjeva, komisija iz stava 3. ovog člana, sačinjava Listu kandidata koji ispunjavaju uvjete za pristupanje edukaciji i istu dostavlja ministru.

Po provedenom postupku, a nakon dostavljanja Liste iz stava 6. ovog člana, ministar donosi rješenje o odobravanju provođenja edukacije za sve prijavljene polaznike edukacije koji ispunjavaju tražene uvjete saglasno javnom oglasu iz člana 8. ovog pravilnika, u skladu sa programom edukacije.

Rješenje iz stava 7. ovog člana je konačno u upravnom postupku i protiv istog se može pokrenuti upravni spor saglasno propisima o upravnim sporovima.

Rješenje iz stava 7. ovog člana se dostavlja polazniku edukacije odnosno zdravstvenoj ustanovi, privatnoj praksi ili zavodu zdravstvenog osiguranja, ukoliko su isti podnijeli zahtjev za neograničen broj svojih zaposlenika, kao i nosiocu edukacije."

Član 6.

U članu 11, u stavu 1. riječ "javna" se briše.

Član 7.

U članu 13, u stavu 1. riječ "javna" se briše.

U istom članu, u stavu 1., tačka 1. "Opći uvjeti u alineji 2.", riječ: "javna" se briše.

Član 8.

U članu 22, iza stava 2. dodaje se novi stav 3, koji glasi:

"Baza ispitnih pitanja se obavezno objavljuje na web stranicama ovlaštenih ustanova za provedbu edukacije, najkasnije pet radnih dana prije zakazane završne provjere znanja."



Član 9.

U članu 23, u stavu 1, na kraju teksta briše se tačka i dodaje zarez, kao i riječi: "na period od četiri godine, sa mogućnošću reizbora za još jedan mandatni period."

U istom članu, iza stava 3. dodaje se novi stav 4, koji glasi: "Ispitna komisija iz stava 1. ovog člana donosi poslovnik o svom radu kojim bliže uređuje način i postupak svog rada, kao i način glasanja i odlučivanja, te isti podliježe saglasnosti ministra."

Dosadašnji stav 4. postaje stav 5.

Član 10.

U članu 24, u stavu 2. "Za članove ispitne komisije", alineja jedan mijenja se i glasi:

"- završen II ciklus akademskog studija iz oblasti menadžmenta i/ili zdravstvenog menadžmenta. Ovaj kriterij mora ispuniti minimalno jedan član Ispitne komisije."

Član 11.

U članu 26, iza stava 2. dodaje se novi stav 3. koji glasi:

"Ukoliko polaznik edukacije ne pristupi provjeri znanja u utvrđenim terminima, ima pravo pristupiti istoj provjeri znanja, i to u terminu naredne generacije polaznika istog nivoa edukacije."

Član 12.

Iza člana 26, dodaju se novi čl. 26a, 26b. i 26c, koji glase:

"Član 26a.

Nakon uspješno završene edukacije iz zdravstvenog menadžmenta za sva tri nivoa edukacije, polaznik edukacije pristupa izradi završnog rada, a nakon odobrene teme završnog rada.

Temu završnog rada i završni rad iz stava 1. ovog člana odobrava i ocjenjuje Koordinaciono tijelo.

Član 26b.

Polaznik edukacije dužan je prijaviti temu završnog rada Koordinacionom tijelu koje prihvata/odbija prijavljenu temu završnog rada, u roku od sedam dana od dana prijave teme i obavijest o istom prosljeđuje Ministarstvu i polazniku edukacije.

Koordinaciono tijelo se, u roku iz stava 1. ovog člana, elektronskim putem očituje o prihvatanju, odnosno odbijanju prijavljene teme završnog rada.

Nakon prihvatanja prijavljene teme završnog rada, polaznik edukacije pristupa izradi završnog rada saglasno proceduri utvrđenoj od strane Koordinacionog tijela.

Završni rad se predaje Ministarstvu u štampanoj formi, u tri potpisana primjerka i u elektronskoj formi.

Član 26c.

Koordinaciono tijelo dužno je pregledati dostavljeni završni rad i dati svoje mišljenje u roku od 15 radnih dana od dana dostavljanja završnog rada.

Koordinaciono tijelo završni rad ocjenjuje deskriptivnom ocjenom: "prihvata se" ili "odbija se".

Koordinaciono tijelo se, u roku iz stava 1. ovog člana, elektronskim putem očituje o prihvatanju odnosno odbijanju prijavljenog završnog rada.

Završni rad smatra se prihvaćenim ukoliko je o istom postignut konsenzus Koordinacionog tijela.

Sekretar Koordinacionog tijela, u roku od sedam dana od dana isteka roka iz stava 1. ovog člana, obavještava polaznika edukacije i Ministarstvo o konačnoj deskriptivnoj ocjeni završnog rada.

U slučaju da Koordinaciono tijelo završni rad ocijeni deskriptivnom ocjenom "odbija se", polaznik edukacije ima mogućnost da završni rad korigira u narednom roku od 15 dana od dana dostavljanja ocjene.

U slučaju iz stava 6. ovog člana korigirani završni rad podliježe proceduri ocjenjivanja utvrđenoj u st. 1. do 5. ovog člana."

Član 13.

U članu 27, stav 3. se mijenja i glasi:

"Sadržaj i izgled zapisnika o provjeri znanja nalazi se u Prilogu 4. i čini sastavni dio ovog pravilnika."

Član 14.

U članu 29, u stavu 3., iza riječi: "obavezni su da" dodaje se zarez i riječi: "prije početka edukacije,".

Član 15.

U članu 32, iza stava 2. dodaje se novi stav 3, koji glasi:

"Visina troškova koje uplaćuje podnosilac zahtjeva iz stava 1. ovog člana, utvrđuje se posebnim rješenjem ministra."

Član 16.

U članu 33, iza stava 4, dodaju se novi st. 5. i 6. koji glase:

"Troškove priznavanja edukacije iz člana 31. ovog pravilnika utvrđuje ministar posebnim rješenjem, a snosi ih podnosilac zahtjeva iz člana 32. ovog pravilnika.

Komisija donosi poslovnik o svom radu kojim bliže uređuje način i postupak svog rada, kao i način glasanja i odlučivanja, te isti podliježe saglasnosti ministra."

Član 17.

U članu 34, iza stava 1, dodaje se novi stav 2. koji glasi:

"Izuzetno, kriterij iz stava 1. alineja 1. ovog člana moraju ispunjavati minimalno dva člana Komisije."

Član 18.

U članu 37, iza stava 3. dodaju se novi st. 4. i 5. koji glase:

"U slučaju da je podnosiocu zahtjeva izdato rješenje kojim se priznaje zahtjev u cijelosti, a u smislu stava 1. ovog člana, podnosilac zahtjeva stiče pravo i na izdavanje certifikata o obavljenoj ekvivalenciji iz zdravstvenog menadžmenta, čiji je sadržaj i izgled sastavni dio ovog pravilnika (Prilog 6.)

Certifikat iz stava 4. ovog člana je namijenjen pravnom saobraćaju u zemlji i inostranstvu i nosiocu certifikata omogućava prepoznatljivost SHCE programa u BiH i inostranstvu, kao i informacije o znanju, vještinama i kompetencijama stečenim u oblasti edukacije iz zdravstvenog menadžmenta."

Član 19.

Iza člana 38, dodaje se novi član 38a. koji glasi:

"Član 38a.

"Polaznici edukacije koji su uspješno okončali sva tri nivoa programa zdravstvenog menadžmenta saglasno ovom pravilniku, dužni su kontinuirano, svake naredne godine, obnoviti znanje iz zdravstvenog menadžmenta prikupljanjem minimum 20 KPE bodova.

Od ukupnih minimalnih 20 KPE bodova iz stava 1. ovog člana, 10 KPE bodova prikuplja se kroz sve vrste stručnog usavršavanja, dok se preostalih minimalnih 10 KPE bodova prikuplja kroz *tailor made* kurseve kojim se obavljaju i proširuju znanja iz oblasti zdravstvenog menadžmenta.

Vrednovanje stručnih usavršavanja obavlja Koordinaciono tijelo saglasno vrsti skupa, opisu učešća skupa, kao i bodovima, a koji su sastavni dio ovog pravilnika. (Prilog 7.)

Svaki TM refresher kurs sastoji se od 10 sati nastave (1 dan) i obuhvata sve matične oblasti obuhvaćena edukacijom cjeloživotnog programa (SHCE 1, SHCE 2 i SHCE 3), te nosi ukupno 10 KPE bodova.

Sadržaj nastavnih edukativnih programa iz stava 4. ovog člana utvrđuje Koordinaciono tijelo za svaku narednu godinu.

U 10 sati nastave iz stava 4. ovog člana, polaznici edukacije će biti upoznati sa novim znanjima, vještinama i kompetencijama iz date oblasti.



Član 38b.

Ministarstvo, u saradnji sa ovlaštenim ustanovama koje provode edukaciju iz zdravstvenog menadžmenta, prati provedbu člana 38a. ovog pravilnika."

Član 20.

U Prilogu 1, u rubrici "Završni rad", broj "25" mijenja se brojem "10".

Član 21.

U Prilogu 2. u rubrikama "Odnosi sa javnošću i marketing" i "Zdravstveno poduzetništvo", brojevi: "7,5" mijenjaju se u broj: "10".

U Prilogu 2, u rubrici "Završni rad", broj "25" mijenja se brojem "10".

Član 22.

U Prilogu 3. rubrika "Završni rad" mijenja se i glasi:
"Završni rad 20 h
Metodologija izrade završnog rada kao obavezni modul 5 h".

Član 23.

Dosadašnji Prilog 4, postaje Prilog 5.

Član 24.


Primjena ovog pravilnika odnosi se i na polaznike edukacije za sva tri nivoa edukacije iz zdravstvenog menadžmenta, a koji su edukaciju otpočeli u skladu sa Pravilnikom koji je bio u primjeni prije stupanja na snagu ovog pravilnika, kao i na Koordinaciono tijelo koje je bilo formirano saglasno propisima o organizacija organa uprave Federacije BiH, a prije stupanja na snagu ovog pravilnika.

Član 25.

Ovaj pravilnik stupa na snagu osmog dana od dana objavljivanja u "Službenim novinama Federacije BiH".

Broj 01-37-5695/13
18. oktobra 2013. godine
Sarajevo

gMinistar
Prof. dr. **Rusmir Mesihović**, s. r.



Prilog 4.
ZAPISNIK
o završenoj provjeri znanja

BOSNA I HERCEGOVINA
FEDERACIJA BOSNE I HERCEGOVINE
FEDERALNO MINISTARSTVO ZDRAVSTVA

OVLAŠTENA
ZDRAVSTVENA USTANOVA


OVLAŠTENA
VISOKOŠKOLSKA USTANOVA

KONTINUIRANA PROFESIONALNA EDUKACIJA IZ ZDRAVSTVENOG MENADŽMENTA
ZA NIVO – SHCE

ZAPISNIK

o polaganju ispita polaznika SHCE održanog dana godine

Pismeni dio ispita -eliminatorsan - Broj pitanja - Svaki tačan odgovor = boda - Max broj bodova na pismenom dijelu ispita = bodova - Min broj bodova za prolaz = bodova (.....%)		Usmeni dio ispita – raspored bodova - Max broj bodova na usmenom dijelu ispita = - Min broj bodova za prolaz = bodova (.....%)	
Upravljanje vremenom	Sadržaj	Prezentiranje	Timski rad/vodstvo
-	-	-	-
		Ukupno	
		-	




**ZA PROLAZ PO OBA KRITERIJA POTREBNO UKUPNO BODOVA
55≤ PROŠAO
55> PAO**

Ispitna Komisija:

1. _____
2. _____
3. _____

Sekretar Komisije:



Prilog 6.

BOSNA I HERCEGOVINA
FEDERACIJA BOSNE I HERCEGOVINE
FEDERALNO MINISTARSTVO ZDRAVSTVA

BOSNIA AND HERZEGOVINA
FEDERATION OF BOSNIA AND HERZEGOVINA
FEDERAL MINISTRY OF HEALTH

Broj:
Mjesto:

Na osnovu člana 37. stav 4. Pravilnika o kontinuiranoj profesionalnoj edukaciji iz zdravstvenog menadžmenta ("Službene novine Federacije BiH", br. 88/11 i), federalni ministar zdravstva izdaje

**CERTIFIKAT
O OBAVLJENOJ EKVIVALENCIJI IZ ZDRAVSTVENOG MENADŽMENTA**

..... (prezime, očevo ime, ime) (stručno zvanje)
rođen-a (dan, mjesec, godina) (mjesto)
..... (općina) (država)
nakon obavljene ekvivalencije iz zdravstvenog menadžmenta	
..... (standardizirana edukacija-SHCE/kratki tematski kursevi-TMC)	


stekao-la je pravo na izdavanje sertifikata kojim se priznaje znanje iz zdravstvenog menadžmenta za.....
(operativni menadžment-osnovni nivo, srednji menadžment-srednji nivo,
top menadžment -napredni nivo)

ZA NOSIOCE EDUKACIJE:
Direktor zdravstvene ustanove
.....

MINISTAR
.....

Dekan visokoškolske ustanove
.....

M.P.



Prilog 7.

1. STRUČNI SKUP ¹			
Vrsta skupa	Opis učešća		Vrednovanje u bodovima
DOMAĆI STRUČNI SKUP	AKTIVNO	Predavač/voditelj radionice	5
		Poster autor	4
		Poster koautori (do 3 autora)	3,5
	PASIVNO		3
MEĐUNARODNI STRUČNI SKUP	AKTIVNO	Predavač/voditelj radionice	6
		Poster autor	5
		Poster koautori (do 3 autora)	4,5
	PASIVNO		4

¹Stručni skup je skup koji traje najmanje 2 dana, sadržava najmanje dvije teme, te može uključivati predavanja, poster prezentacije i/ili radionicu.

Međunarodni skup je skup sa međunarodnim učešćem, a na kojem je strani jezik službeni jezik skupa.

3. OSTALI STRUČNI SKUPOVI ³		
Vrsta skupa	Opis učešća	Vrednovanje u bodovima
PREDAVANJE	AKTIVNO (predavač)	2,5
	PASIVNO	1,5
RADIONICA	AKTIVNO (voditelj radionice)	2,5
	PASIVNO	1,5

³Ostali stručni skupovi obuhvaćaju predavanje u trajanju najmanje 45 min i radionicu u trajanju najmanje 1 sat.